



Na osnovu poglavlja VI član 2. i 4. Ustava Federacije Bosne i Hercegovine («Službene novine Federacije Bosne i Hercegovine», broj 1/94 i 13/97), člana 36. Ustava Kantona Sarajevo («Službene novine Kantona Sarajevo», br. 1/96, 2/96, 3/96, 16/97 i 14/00) člana 6. Zakona o osnovama lokalne samouprave («Službene novine Federacije Bosne i Hercegovine br. 6/95), člana 29. tačka 1. Zakona o lokalnoj samoupravi («Službene novine Kantona Sarajevo», broj 19/97.), člana 69. Statuta Općine Stari Grad Sarajevo («Službene novine Kantona Sarajevo» 17/99, i 21/06) i člana 82. do 84. Poslovnika Općinskog Vijeća Stari Grad Sarajevo («Službene novine Kantona Sarajevo» br. 18/98, 14/99 i 21/04) Općinsko vijeće Stari Grad Sarajevo, na sjednici održanoj _____ donijelo je zaključak o utvrđivanju prečišćenog teksta Statuta Općine Stari Grad Sarajevo.

Prečišćeni tekst Statuta Općine Stari Grad Sarajevo obuhvata: Statut Općine Stari Grad Sarajevo («Službene novine Kantona Sarajevo» br.10/98), Odluku o izmjenama i dopunama Statuta Općine Stari Grad Sarajevo («Službene novine Kantona Sarajevo» broj 17/99) i izmjene i dopune Statuta Općine Stari Grad Sarajevo («Službene novine Kantona Sarajevo broj: 21/04) u kojima je naznačen dan stupanja na snagu tih odluka.

S T A T U T **OPĆINE STARI GRAD SARAJEVO** **(Prečišćeni tekst)**

I – OPĆE ODREDBE

Član 1.

Statutom Općine Stari Grad Sarajevo uređuju se prava i obaveze odlučivanja o interesima i potrebama građana Općine Stari Grad Sarajevo (u daljem tekstu: Općina), obim lokalne samouprave, unutrašnja struktura i nadležnosti Općine, učešće građana u lokalnoj samoupravi, finansiranje Općine, kao i druga pitanja, prava, obaveze i nadležnosti Općine.

Član 2.

Općina je dužna da u ostvarivanju svojih zadataka poštuje osnovna ljudska prava i temeljne slobode i da svim građanima osigura jednaka prava uz poštivanje njihovog nacionalnog, vjerskog i kulturnog identiteta.

Član 3.

U Općini će se poduzimati posebne mjere na obezbjeđenju dodatne zaštite članova porodica šehida i palih boraca, ratnih vojnih invalida i učesnika rata, te na obilježavanju i očuvanju identiteta Općine kao jezgra otpora i odbrane.

Član 4.

U Općini će se voditi stalne aktivnosti na zaštiti i očuvanju gospodarskog, urbanističkog i graditeljskog naslijeđa koncentriranog na užem području Općine.



Član 5.

Općina je teritorijalna jedinica u kojoj građani ostvaruju lokalnu samoupravu u poslovima utvrđenim Ustavom, Zakonom i Statutom Općine.

U ostvarivanju lokalne samouprave općinske vlasti, u granicama zakona, imaju puno diskreciono pravo da provode svoje inicijative u vezi sa stvarima koje nisu isključene iz njihove nadležnosti, niti stavljene u nadležnost neke druge vlasti.

Član 6.

Pravo na lokalnu samoupravu obuhvaća pravo građana da preko neposredno izabраних organa učestvuju u vođenju javnih poslova, osiguranju uvjeta za život i rad, zaštitu i unapređenje njihovih zajedničkih interesa.

Pravo na lokalnu samoupravu podrazumijeva obavljanje javnih poslova od strane vlasti koje su najbliže građanima.

Član 7.

Lokalna samouprava je pravo, obaveza i osposobljenost općinskiх vlasti da u granicama Ustava i Zakona regulira i upravlja određenim javnim poslovima u skladu sa interesima građana.

Član 8.

Teritorij Općine utvrđen je posebnim zakonom.

Sjedište Općine je u Sarajevu.

Službeno ime Općine je OPĆINA STARI GRAD SARAJEVO.

Član 9.

Općina ima svojstvo pravne osobe.

Općina ima svoj pečat.

Općina ima grb i zastavu, čiji se izgled i način korištenja utvrđuju posebnom odlukom.

II – NADLEŽNOSTI OPĆINE

Član 10.

U vršenju svojih nadležnosti Općina :

1. omogućava uvjete za gospodarski napredak i brine za ravnomjeran razvoj svih područja Općine ;

2. donosi programe razvoja djelatnosti od značaja za Općinu ;

3. u skladu sa Zakonom osigurava lokalne potrebe stanovništva u oblastima: brige odjeci, obrazovanju i odgoju, radu i zapošljavanju, socijalnoj zaštiti, kulturi, tehničkoj kulturi, fizičkoj kulturi i sportu;

4. vodi urbanističko-stambenu politiku od značaja za Općinu i njen razvoj: donosi detaljne urbanističke planove, dodjeljuje na korištenje gradsko-građevinsko zemljište, stvara uvjete za izgradnju stanova i brine za povećanje fonda općinskiх stanova, gradi, održava i uređuje lokalne javne ceste, rekreacijske i druge javne površine i objekte, brine za zaštitu zraka, tla i voda, zaštitu od buke, zaštitu životinja i bilja, kao i o drugim poslovima zaštite okolišta;



5. osigurava uvjete rada lokalnih radio i televizijskih stanica, u skladu sa Zakonom;
6. u skladu sa Zakonom, osigurava javni red i mir, zaštitu građana i imovine;
7. upravlja općinskom imovinom ;
8. vodi brigu o turističkim resursima Općine;
9. donosi propise o oporezivanju i na druge načine osigurava potrebno finansiranje koje nisu osigurali kantonalna i federalna vlast;
10. osniva ustanove, preduzeća i druge organizacije radi ostvarivanja određenih interesa i potreba stanovništva;
11. obavlja upravne poslove iz svoje nadležnosti.

Član 11.

Općina može, u skladu sa Zakonom, obavljanje pojedinih poslova povjeriti ustanovama, preduzećima i drugim pravnim osobama osnovanim radi obavljanja javnih službi u Općini.

Član 12.

Općina vrši poslove u oblastima obrazovanja, kulture, sporta, turizma, lokalnog poslovanja, humanitarne djelatnosti, radija i televizije i druge poslove koje Kanton Sarajevo i Federacija Bosne i Hercegovine prenesu na Općinu.

III – NEPOSREDNO SUDJELOVANJE GRAĐANA U ODLUČIVANJU

Član 13.

U poslovima iz nadležnosti Općine građani mogu neposredno sudjelovati: odlučivanjem na referendumu, putem zbora građana raspravljati o svim pitanjima iz samoupravnog djelokruga Općine i predlagati donošenje općeg akta, građanskom inicijativom i na druge načine u skladu sa Zakonom i Statutom Općine.

Član 14.

Referendum raspisuje Općinsko vijeće za područje cijele Općine ili njene pojedine dijelove.

Član 15.

Referendum se može raspisati radi odlučivanja o prijedlogu za promjenu Statuta Općine, o prijedlogu propisa ili drugog općeg akta, kao i o drugim pitanjima iz djelokruga Općinskog vijeća i drugim pitanjima određenim Zakonom i Statutom Općine.

Član 16.

Referendum, na osnovu Zakona i Statuta Općine, raspisuje Općinsko Vijeće, na prijedlog jedne trećine članova Općinskog vijeća, na prijedlog Općinskog načelnika ili na prijedlog jedne petine mjesnih zajednica sa područja Općine.

Odlukom o raspisivanju referenduma bliže se uređuje postupak njegovog održavanja.

Član 17.

Pravo odlučivanja na referendumu imaju građani koji imaju prebivalište na području Općine i upisani su u birački spisak.

Odluka donesena na referendumu obavezna je za Općinsko vijeće.

Član 18.

O svakom pitanju iz nadležnosti Općinskog vijeća može se pokrenuti rasprava putem građanske inicijative.

Broj građana koji mogu pokrenuti građansku inicijativu ne može biti manji od stotinu.

Član 19.

Općinsko vijeće dužno je razmotriti građansku inicijativu i donijeti o njoj odluku na prvoj narednoj sjednici, a najkasnije u roku od mjesec dana.

Pismena odluka se dostavlja nosiocu inicijative odmah po njenom donošenju.

IV – ORGANI OPĆINE

Član 20.

Općinsko vijeće i Općinski načelnik su organi vlasti u Općini koji svoju funkciju vrše u skladu sa Ustavom, Zakonom i Statutom Općine.

1. Općinsko vijeće

Član 21.

Općinsko vijeće je predstavničko tijelo građana i Općine.

Općinsko vijeće ima 31 vijećnika.

Nakon Općinskih izbora koji će se održati 2000.godine Općinsko vijeće će biti sastavljeno od 31 vijećnika.

Trajanje mandata općinskih vijećnika uređuje se Ustavom i Zakonom.

Član 22.

Vijećnike Općinskog vijeća biraju, na višestranačkim, slobodnim i demokratskim izborima, birači neposrednim i tajnim glasanjem na cijelom području Općine, u skladu sa Zakonom.

Član 23.

Općinsko vijeće donosi propise i akte u okviru prava i dužnosti Općine i obavlja druge poslove u skladu sa Ustavom, Zakonom i Statutom Općine.

Član 24.

Unutrašnja organizacija i način rada Općinskog vijeća uređuju se Poslovníkom, u skladu sa Zakonom i Statutom Općine.

Član 25.

Općinsko vijeće :

1. dvotrećinskom većinom donosi Statut Općine i odlučuje o njegovim promjenama;
2. donosi odluke i druge akte i daje njihovo tumačenje;
3. donosi budžet i izvještaj o izvršenju budžeta i usvaja završni račun na prijedlog Općinskog načelnika;
4. donosi programe razvoja za pojedine djelatnosti;
5. razmatra inicijativu za pokretanje postupka smjenjivanja Općinskog načelnika;
6. bira i razrješava dužnosti predsjedavajućeg i zamjenika predsjedavajućeg Općinskog vijeća iz reda svojih članova ;
7. bira i razrješava dužnosti sekretara Općinskog vijeća;
8. donosi propise o organizaciji i osniva organ uprave;
9. osniva ustanove, preduzeća i druge pravne osobe za obavljanje djelatnosti od posebnog interesa za Općinu;
10. vrši izbor, imenovanja i razrješavanja u skladu sa Zakonom, Statutom Općine i drugim aktima,;
11. osniva radna tijela Općinskog vijeća, bira i razrješava dužnosti predsjednika, zamjenika predsjednika i članove tih radnih tijela;
12. donosi propise o općinskim pristojbama i na drugi način osigurava potrebna finansijska sredstva u skladu sa zakonom, te odlučuje o zaduženju Općine;
13. utvrđuje naziv za dijelove naseljenog mjesta;
14. podnosi inicijativu za davanje i promjenu naziva za dijelove naseljenog mjesta (ulice, trgovi, mostovi, parkovi i sl.),
15. dodjeljuje javna priznanja Općine,
16. vrši poslove drugostepenog organa koje je Općinski načelnik rješavao na osnovu propisa Općine.

Član 26.

Predsjedavajući Općinskog vijeća predstavlja to vijeće, saziva i vodi njegove sjednice i obavlja druge poslove u skladu sa Statutom Općine i Poslovníkom Općinskog vijeća.

Član 27.

Predsjedavajući saziva sjednice Općinskog vijeća po svojoj inicijativi, a dužan je sazvati sjednicu na zahtjev Općinskog načelnika ili najmanje jedne trećine Općinskih vijećnika, odnosno 12 vijećnika.

Član 28.

Zamjenik predsjedavajućeg Općinskog vijeća pomaže predsjedavajućem i zamjenjuje ga u slučaju njegove odsutnosti.

Član 29.

Predsjedavajući i zamjenik predsjedavajućeg Općinskog vijeća svoju dužnost mogu obavljati profesionalno, što se utvrđuje prilikom izbora.

Član 30.

Općinski vijećnik vrši dužnost prema svom slobodnom uvjerenju, a za svoj rad odgovara građanima koji su ga birali.

Član 31.

Općinski vijećnici će biti plaćeni za svoj rad što će se utvrditi odlukom Općinskog vijeća.

Član 32.

Općinski vijećnici ne mogu biti krivično gonjeni niti odgovorni u građanskom postupku za bilo koju radnju učinjenu u vršenju svoje funkcije.

Član 33.

Općinsko vijeće donosi odluke većinom glasova od ukupnog broja svojih članova. Izuzetno od prethodnog stava, Općinsko vijeće odlučuje dvotrećinskom većinom o sljedećim pitanjima:

- donošenju i promjeni Statuta Općine,
- zaduživanju Općine,
- budžetu i završnom računu budžeta,
- eksproprijaciji nekretnina i prometu nekretnina i prava,
- prenesenim nadležnostima Općine,
- osnivanju mjesne zajednice.

Član 34.

Općinsko vijeće ima stalna i povremena radna tijela.

Radna tijela razmatraju prijedloge odluka i drugih akata, te druga pitanja iz nadležnosti Općinskog vijeća i o njima daju svoja mišljenja i prijedloge, odnosno donose rješenja.

Član 35.

Općinsko vijeće bira sekretara Općinskog vijeća koji tu dužnost obavlja profesionalno.

Sekretar Općinskog vijeća sa predsjedavajućim i zamjenikom predsjedavajućeg Općinskog vijeća učestvuje u pripremi sjednica Općinskog vijeća i njegovih radnih tijela, te obavlja druge poslove u skladu sa Statutom Općine i Poslovníkom Općinskog vijeća.



Općinski načelnik

Član 36.

Općinski načelnik je izvršno-upravni organ Općine.

Općinski načelnik je odgovoran Općinskom vijeću i javnosti za obavljanje poslova iz djelokruga Općine, a naročito za:

1. sprovođenje općinske politike, izvršavanje općinskih propisa i izvršavanje Općini prenesenih nadležnosti od strane Kantona i Federacije,
2. organizaciju i funkcioniranje općinske uprave,
3. osiguranje saradnje općinskih službenika sa ombudsmenima,
4. imenovanje i smjenjivanje svih općinskih službenika i namještenika.

Član 37.

Općinskog načelnika biraju demokratskim putem birači na neposrednim i tajnim izborima na cijelom području Općine, na način utvrđen Zakonom.

Mandat općinskog načelnika je četiri (4) godine.

Član 38.

Inicijativa sa obrazloženjem za pokretanje postupka opoziva Općinskog načelnika se može pokrenuti od strane Općinskog vijeća putem 1/3 (jedne trećine) vijećnika Općinskog vijeća ili 10% registiranih birača na području Općine.

Općinsko vijeće je dužno sve inicijative za pokretanje postupka opoziva Općinskog načelnika iz stava 1. ovog člana staviti na dnevni red na prvoj idućoj sjednici Općinskog vijeća.

Odluka o pokretanju postupka opoziva Općinskog načelnika se donosi većinom glasova od ukupnog broja vijećnika u Općinskom vijeću.

U slučaju prihvatanja inicijative Općinsko vijeće je dužno donijeti Odluku o pokretanju postupka opoziva Općinskog načelnika u roku od 30 dana.

Ako Općinsko vijeće donese Odluku o prihvatanju inicijative za pokretanje postupka opoziva Općinskog načelnika sprovodi se postupak u kojem građani odlučuju neposrednim tajnim glasanjem.

Mandat Općinskog načelnika prestaje ukoliko nadpolovična većina građana koji su glasali donese odluku o opozivu Općinskog načelnika.

Odluka građana je obavezujuća za Općinsko vijeće i Općinskog načelnika.

Nakon izglasavanja opoziva novi izbori za Općinskog načelnika raspisuju se u roku od 60 dana.

Član 39.

Općinskog načelnika, za slučaj spriječenosti da obavlja svoju dužnost, privremeno mijenja predsjedavajući Općinskog vijeća ili vijećnik kojeg većinom glasova izabere Općinsko vijeće.

V – SLUŽBE ZA UPRAVU

Član 40.

Za obavljanje poslova iz svoje nadležnosti, poslova lokalne samouprave i upravnih poslova iz djelokruga Općine, kao i upravnih poslova prenesenih od Kantona i Federacije, Općinski načelnik organizira općinske službe za upravu.

Općinski načelnik sa službama za upravu čini jedinstveni organ uprave.

Odluku o obrazovanju jedinstvenog općinskog organa uprave donosi Općinsko vijeće, na prijedlog Općinskog načelnika.

Član 41.

Općinski načelnik postavlja rukovodeće službenike i pomoćnike načelnika koji rukovode službama za upravu, u skladu sa Zakonom o državnoj službi u Federaciji Bosne i Hercegovine.

VI – MJESNA ZAJEDNICA

Član 42.

Mjesna zajednica se osniva kao oblik neposrednog učestvovanja građana u odlučivanju o lokalnim poslovima.

Mjesna zajednica se osniva za jedno naseljeno mjesto, više međusobno povezanih manjih naselja ili za veći dio naselja koji, u odnosu na ostale dijelove čini zasebnu razgraničenu cjelinu.

Član 43.

Mjesnu zajednicu osniva Općinsko vijeće.

Inicijativu za osnivanje mjesne zajednice mogu dati građani, i njihove organizacije i udruženja.

Član 44.

Odluku o osnivanju mjesne zajednice donosi Općinsko vijeće, ako se za istu izjasni najmanje dvije trećine općinskih vijećnika.

Član 45.

Mjesna zajednica ima svojstvo pravnog lica u pogledu prava i obaveza utvrđenih Statutom Općine i Zakonom.

Član 46.

Mjesna zajednica je nadležna za obavljanje poslova koji neposredno utječu na svakodnevne potrebe i život i rad građana, u skladu sa Zakonom, a koji se odnose na:

1. izgradnju i održavanje puteva, kanalizacije, vodovoda i drugih komunalnih potreba,

2. uređenje naselja, izgradnju i održavanje parkova, naselja, dječijih igrališta i sportskih objekata,
3. izgradnju i održavanje grobalja,
4. čišćenje javnih površina, zaštitu i unapređenje životne sredine,
5. obavljanje drugih poslova od interesa za život i rad građana u mjestu stanovanja, a u skladu sa pravilima mjesne zajednice.

Član 47.

Odlukom Općine može se mjesnoj zajednici povjeriti obavljanje pojedinih poslova iz samostalnog djelokruga Općine, koji su od neposrednog i svakodnevnog utjecaja na život i rad građana na području mjesne zajednice.

Sredstva za obavljanje poslova iz prethodnog stava obezbjeđuju se iz budžeta Općine.

Član 48.

Organi mjesne zajednice su: zbor građana, savjet i drugi organi utvrđeni pravilima mjesne zajednice.

Član 49.

Zbor građana mjesne zajednice čine svi građani nastanjeni na području mjesne zajednice.

Zborom građana predsjedava predsjednik.

Zbor građana bira odbor od tri do pet članova koji je dužan pripremiti izbore za Savjet mjesne zajednice, najkasnije u roku od 60 dana od dana osnivanja mjesne zajednice.

Član 50.

Savjet mjesne zajednice je izvršno tijelo mjesne zajednice. Broj članova savjeta ne može biti manji od pet, niti veći od deset, ovisno od veličine, razvijenosti i broja stanovnika mjesne zajednice.

Savjet mjesne zajednice biraju građani s područja mjesne zajednice, koji imaju biračko pavo, neposrednim i tajnim glasanjem.

Predsjednika savjeta bira Savjet mjesne zajednice.

Mandat članova Savjeta traje dvije godine.

Savjet mjesne zajednice priprema pravila i program rada mjesne zajednice, finansijski plan i zaključni račun, obavlja i druge poslove koji su od značaja za ostvarivanje zajedničkih interesa i potreba građana sa područja mjesne zajednice, utvrđene pravilima mjesne zajednice.

Član 51.

Pravilima mjesne zajednice, u skladu sa Zakonom i Statutom Općine, bliže se uređuju: sadržaj poslova mjesne zajednice, organi mjesne zajednice, način njihovog izbora i opoziva, njihova nadležnost, način finansiranja mjesne zajednice, postupak organiziranja izbora za savjet mjesne zajednice, odnos prema Općini i njenim organima, odnos prema pravnim licima na području mjesne zajednice i druga pitanja značajna za rad mjesne zajednice.

Član 52.

Predsjednik savjeta predstavlja Savjet, saziva sjednice Savjeta i predsjedava im, izvršava program rada i finansijski plan, obavlja i druge poslove u skladu sa pravilima mjesne zajednice.

Predsjednik savjeta za svoj rad odgovara Savjetu, a Općinskom načelniku za obavljanje onih poslova koji su iz samoupravnog djelokurga Općine prenijeti na mjesnu zajednicu.

Član 53.

Savjet mjesne zajednice može sazivati zbor građana radi raspravljanja o određenim potrebama i interesima građana, te davanja prijedloga za rješavanje pitanja od značaja za mjesnu zajednicu.

Način sazivanja zbora građana, njihovog rada i odlučivanja, izbora predsjednika zbora građana i druga pitanja koja se odnose na rad zbora građana uređuju se pravilima mjesne zajednice.

Član 54.

Administrativne poslove za potrebe mjesne zajednice obavlja sekretar mjesne zajednice,

Sekretara mjesne zajednice imenuje Općinski načelnik, na prijedlog Savjeta MZ. Sekretar mjesne zajednice obavlja svoju dužnost profesionalno.

Član 55.

Sredstva za zadovoljavanje potreba i interesa građana u mjesnoj zajednici obrazuju se od:

1. sredstva građana koja oni udružuju putem samodoprinosu ili na neki drugi način,
2. naknada za usluge i drugih prihoda koje svojim aktivnostima ostvaruje mjesna zajednica,
3. prihoda koje Općina ustupa mjesnoj zajednici, u skladu sa planovima razvoja mjesne zajednice, odnosno Općine,
4. poklona i drugih sredstava.

Član 56.

Nadzor nad zakonitošću rada organa mjesne zajednice obavlja Općinski načelnik.

Općinski načelnik ima pravo predložiti Općinskom vijeću da raspusti Savjet mjesne zajednice, ako on u svom radu učestalo krši pravila mjesne zajednice i ne izvršava povjerene poslove.

VII – ZAŠTITA PRAVA GRAĐANA

Član 57.

Radi ostvarivanja Ustavom, Zakonom i Statutom Općine utvrđenih prava građana, u Općini se osigurava zaštita prava građana na lokalnu samoupravu.



Član 58.

Svaki građanin, organi Općine, mjesne zajednice, političke organizacije, udruženja i druge organizacije mogu pokrenuti inicijativu za ocjenu ustavnosti i zakonitosti propisa i akata organa kojima se povređuju prava građana na lokanu samoupravu.

Član 59.

Zaštita prava građana na lokalnu samoupravu obuhvata:

1. prava građana da putem referendumu i drugih oblika odlučivanja ličnim izjašnjavanjem i preko slobodno izabranih predstavnika, odlučuju o poslovima lokalnog značaja,
2. pravo građana na samoorganiziranje, u skladu sa Zakonom,
3. pravo građana da budu konsultirani o svim pitanjima kada, se Zakonom uređuju pitanja kojima se reguliraju prava i obaveze Općine,
4. prava građana da na zborovima građana razmatraju i daju mišljenja u slučajevima kada Kanton ili Federacija žele prenijeti pojedine poslove iz okvira svoje nadležnosti na Općinu.

VIII – FINANSIRANJE I IMOVINA OPĆINE

Član 60.

Općina ima odgovarajuće vlastite izvore finansiranja, kojima raspolaže slobodno, u okviru svojih ovlaštenja.

Sistemom finansiranja osigurat će se da jedan dio sredstava potječe od lokalnih pristojbi i naknada za koje visinu stope utvrđuje Općina.

Član 61.

Općini pripadaju prihodi utvrđeni Zakonom, kao i sredstva za obavljanje poslova prenesenih od Kantona.

Član 62.

Općina se može zaduživati i zaključivati ugovore o kreditu, o čemu odlučuje Općinsko vijeće.

Član 63.

Općina ima budžet u kome se iskazuju prihodi i rashodi.

Po isteku godine, za koju je donesen budžet, donosi se završni račun o izvršenju budžeta.

Član 64.

Općina može imati u vlasništvu nepokretnu i pokretnu imovinu.

Imovinom Općine mora se upravljati brižno, u skladu sa Zakonom i drugim propisima.

IX – SARADNJA SA DRUGIM OPĆINAMA

Član 65.

U obavljanju poslova, iz samoupravnog djelokruga, Općina ostvaruje saradnju sa drugim općinama.

Saradnja iz predhodnog stava se planira i ostvaruje u poslovima koji su od njihovog zajedničkog interesa.

Saradnju sa drugim općinama, ostvaruju Općinsko vijeće, odnosno Općinski načelnik, svako po pitanjima iz svog djelokruga.

Član 66.

Općina se može udružiti u zajednicu općina za određeno područje, u skladu sa Zakonom.

Odluku o udruživanju Općine u zajednicu općina donosi Općinsko vijeće, samostalno ili na prijedlog Općinskog načelnika.

Odlukom o udruživanju utvrđuju se ciljevi udruživanja, način ostvarivanja tih ciljeva u zajednici općina i druga pitanja od značaja za rad u zajednici općina.

Član 67.

Općina može pristupiti međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa Zakonom.

Odluku o pristupanju udruženjima, odnosno ostvarivanju saradnje iz prethodnog stava, donosi Općinsko vijeće.

Član 68.

Općina se može udružiti u Savez općina Federacije, o čemu odlučuje Općinsko vijeće.

X PROPISI I DRUGI AKTI OPĆINE

Član 69.

Općinsko vijeće donosi: Statut Općine, općinske propise, budžet, završni račun, izvještaj o izvršenju budžeta, Poslovník Općinskog vijeća, zaključke. Daje autentična tumačenja propisa koje donosi i utvrđuje njihov prečišćeni tekst.

Poslovníkom Općinskog vijeća bliže se utvrđuje sadržaj, način pripremanja i donošenja općinskih propisa i drugih akata i način njihovog objavljivanja.

Propisi i opći akti organa Općine moraju biti u saglasnosti sa Ustavom i Zakonom.

Član 70.

Općinski načelnik u izvršavanju propisa i općih akata iz samoupravnog djelokruga Općine donosi i opće akte (uredbe, naredbe, pravilnike i uputstva) i pojedinačne akte kojima se rješava o pravima, obavezama i pravnim interesima fizičkih i pravnih lica u prvom stepenu.

Član 71.

Propisi i opći akti organa Općine objavljuju se u «Službenim novinama Kantona Sarajevo».

Izuzetno, u hitnim i naročito opravdanim slučajevima, propisi se objavljuju na oglasnoj ploči Općine, odnosno na drugi pogodan način, s tim što se moraju naknadno objaviti u «Službenim novinama Kantona Sarajevo».

Član 72.

Propisi i opći akti organa Općine stupaju na snagu osmi dan od dana objavljivanja.

Samo iz naročito opravdanih razloga može se odrediti da propisi i opći akti organa Općine stupaju na snagu u kraćem roku ili danom objavljivanja.

Član 73.

Propisi i drugi akti organa Općine ne mogu imati povratno djelovanje, ukoliko Zakonom nije drukčije određeno.

XI – JAVNOST RADA

Član 74.

Rad organa Općine, mjesne zajednice, ustanova, preduzeća i drugih pravnih osoba čiji je osnivač Općina je javan.

Član 75.

Javnost rada se osigurava javnim održavanjem sjednica, informiranjem putem sredstava javnog informiranja, objavljivanjem propisa i akata i na druge pogodne načine.

Član 76.

Ostvarivanje načela javnosti, ne može biti u suprotnosti sa interesima sigurnosti i odbrane utvrđenim Zakonom.

XII – PROMJENA STATUTA OPĆINE

Član 77.

Promjenu Statuta Općine mogu predložiti Komisija za propise i Statut, najmanje dvanaest općinskih vijećnika, Općinski načelnik ili građani putem građanske inicijative.

Član 78.

Općinsko vijeće prethodno odlučuje da li će se pristupiti raspravi o predloženoj promjeni Statuta Općine.

Ako Općinsko vijeće pristupi raspravi o predloženoj promjeni Statuta Općine, donijet će zaključak o pokretanju postupka za promjenu Statuta Općine, ili će prijedlog za promjenu odbaciti.



XIII- STUPANJA NA SNAGU STATUTA OPĆINE

Član 79.

Prečišćeni tekst Statuta Općine Stari Grad Sarajevo stupa na snagu danom objavljivanja u «Službenim novinama Kantona Sarajevo».

Broj:02-49-
Sarajevo,

**PREDSJEDAVAJUĆI
OPĆINSKOG VIJEĆA STARI GRAD
SARAJEVO**

dr.sc.Rizah Avdić